



# AKORDU FOUN ida ba envolvimentu Nasaun hirak ne'ebé Frajil

## FAKTU HIRAK

- **Emá hamutuk biliaun 1.5** maka moris iha nasaun ne'ebé afeta husi konflitu no frajil.
- **Maiç-ou-menus %70 husi nasaun hirak ne'ebé frajil haree ona konflitu hahú husi tinan 1989.**
- **Transformasaun governasaun baziku karik sei presiza tinan 20-40 atu realiza.**
- **%30 husi Asistensia Oficial ba Dezenvolvimentu (AOD) gasta ba iha kontestu ne'ebé frajil no hetan impaktu husi konflitu.**
- **Nasaun hirak ne'e sei dook hela husi atinjimentu Meta Dezenvolvimentu Mileniu (MDM).**

Maneira serbisu oras ne'e nian iha nasaun hirak ne'ebé frájil presiza tebes atu hadiak. Maske iha ona investimentu ne'ebé signifikante no kompromisu husi Deklarasaun Paris kona-ba Efikasias |Ajuda (2005) no Ajenda Accra ba Asaun (2008), rezultadu no valor ba osan sei modestu nafatin. Atu sai husi situasaun frajilidade presiza tempu ne'ebé kleur tebes, serbisu politiku ne'ebé presiza **lideransa no apropriausaun nasional**. Prosesu ba dialogu politiku dalabarak failla tamba falta fiar, inklusaun no lideransa. Parseiru internasional dalabarak hakat liu tiha interese nasional no ator nasional sira, fornese sira nia ajuda iha maneira ne'ebé teknokratiku ne'ebé ladun valoriza importansia armonizasaun ho kontestu nasional no lokal, no apoia fali rezultadu ba tempu badak duke rezultadu ba tempu mediu no naruk ne'ebé sustentavel ne'ebé hamosu dezenvolvimentu kapasidade no sistema. Nune'e presiza duni **Akordu Foun** ida ba envolvimentu ho nasaun hirak ne'ebé frajil.

## VIZAUN

Ami, membru husi **Dialogu Internasional ba Konsolidasaun Dame no Dezenvolvimentu Nasaun** ("Dialogu"), ne'ebé kompostu grupu g7+, husi nasaun frajil 19 ne'ebé hetan impaktu husi konflitu, parseiru dezenvolvimentu sira, no organizasaun internasional, fiar katak presiza duni arkitetura foun ba dezenvolvimentu no maneira serbisu foun, ne'ebé liga liu ba situasaun no dezafiu hirak iha kontestu frajil, hodi bele dezenvolve estadu no sosiedade pasifikamente.

Buat hirak ne'e apresenta ona iha **Akordu Foun ba Envolvimentu iha Nasaun Frajil** ("Akordu Foun").

"**Akordu Foun**", ne'ebé dezenvolve bazeia ba vizaun no prinsipiu hirak ne'ebé artikula husi Deklarasaun Mileniu ba Roteiro Monróvia, propoin meta prinsipal hirak ba konsolidasaun dame no dezenvolvimentu nasaun, ne'ebé foka liu ba maneira involvimentu foun, no identifika kompromisu atu dezenvolve konfiansa mutual (hamutuk) no atinzi rezultadu ne'ebé diak liu iha nasaun hirak ne'ebé frajil.

Ami rekoñese katak susesu husi esforsu hamutuk ne'e depende ba lideransa no kompromisu husi grupu nasaun frajil g7+ ne'ebé hetan apoiu husi ator internasional sira. Ami mos rekoñese katak relasaun estadu-sosiedade ne'ebé konstrutivu, no emansipasaun feto, foin-sa'e no grupu marjinalizadu sira hanesan ator prinsipal ba dame, mak hanesan sentru ba susesu husi konsolidasaun dame no dezenvolvimentu nasaun. Buat hirak ne'e importante ba implementasaun "Akordu Foun" ne'e.

## AKORDU FOUN

Ami, membru husi "Dialogu", aprova "**Akordu Foun**" no empenha atu hala'o asaun no reforma hirak ne'ebé presiza hodi bele implementa akordu ne'e.

- Ami konkorda atu uza **Meta ba konsolidasaun dame no dezenvolvimentu nasaun (PSG)**, hanesan fundasaun importante ida ne'ebé permite progresu ba MDM hodi orienta ami nia serbisu iha nasaun hirak ne'ebé frajil no hetan impaktu husi konflitu. To'o fulan Setembru 2012, nasaun hirak ne'ebé frajil no parseiru internasional hirak sei dezenvolve ona pakote indikador hirak ba kada meta, ne'ebé sei permite ita atu haree tuir progresu iha nivel global no nivel nasaun.

- Ami kompromete atu **KONSENTRA** ba maneira envolvimentu foun, hodi apoia **tranzisaun atu sai husi frajilidade ne'ebé inkluzivu no nasaun ne'e duni maka na'in** bazeia ba avaliasaun frajilidade ne'ebé nasaun maka diriji ne'ebé g7+ dezenvolve tiha ona ho apoiu husi parseiru internasional sira, vizaun ida no planu ida ne'ebé nasaun maka diriji, kompaktu nasaun nian ida hodi implementa planu, uza PSG hodi monitoriza progresu, no apoia dialogu politiku ne'ebé inkluzivu no partisipativu.
- Ami kompromete atu hamosu **FIAR** ba malu liu husi forneshimentu **ajuda no jere rekursu ho efektivu liu tan no aliña rekursu hirak ne'e ba rezultadu**. Ami sei hametin transparensia, jestaun risku atu uza sistema nasaun nian, haforsa kapasidade nasional no fo ajuda tuir tempu, hadi'a velocidade no preditabilidade fundu hodi atinji rezultadu ne'ebé diak.

## AKORDU FOUN: ninia detallu hirak

### I. Meta ba Konsolidasaun Dame no Dezenvolvimentu Nasaun – PSG hirak

Ami, membru “Dialogu”, konkorda atu uza **Meta ba Konsolidasaun Dame no Dezenvolvimentu Nasaun (PSG)** hanesan baze importante ida hodi permite progresu ba MDM no atu orienta ami nia serbisu iha nasaun hirak ne'ebé frajil no hetan impaktu husi komflitu. Meta lima ne'e mak:

**Lejitimidade politiku** – *Promove akordu politiku no rezolusaun konflitu ne'ebé inkluzivu*

**Seguransa** – *Estabelese no haforsa siguransa ema nian*

**Justisa** – *Atende situasaun laiha justisa no hadi'a asesu ba justisa*

**Baze ba Ekonomia** – *Kria empregu no hadi'a meu ba moris*

**Reseita no Asistensia** – *Jere reseita no dezenvolve kapasidade ba prestasaun assistensia ne'ebé justu no responsavel*

PGS hirak ne'e sei orienta identifikasaun prioridade hirak ba konsolidasaun dame no dezenvolvimentu nasaun iha nivel nasaun. Nia sei informa vizaun nasional, planu no kompaktu iha nivel nasaun hodi implementa planu. Nune'e mos sei informa desizaun fundu ba nivel global no nivel nasaun hodi tulun atu garante katak nasaun frajil hotu, no sira nia prioridade ba konsolidasaun dame no dezenvolvimentu nasaun, sei hetan apoiu.

To'o fulan setembru 2012, nasaun hirak ne'ebé frajil no parseiru internasional sira sei dezenvolve ona pakote indikador hirak ba kada meta, ne'ebé sei permite ita atu haré tuir progresu iha nivel global no nivel nasaun. Indikador hirak ne'e sei kombina objetivu hirak ne'ebé mak hanesan sasukat ho sasukat ne'ebé sei uza hodi kumpriente ema nia hanoin kona-ba rezultadu ne'ebé atinii ona.

Ami sei serbisu ho konsiderasaun tomak ba PSG bainhira dezenvolve ona enkuadramentu MDM hafoin tinan 2015, no hafoin Busan, nune'e Assembleia Jeral Nasoens Unidas 2012 no forum hirak seluk bele konsidera PSG.

### II. FOCUS – Envolvimentu hodi apoia nasaun ninia lideransa no hakarak rasik atu sai husi frajilidade

Hanesan parte husi “**Akordu Foun**” ne'e, ami kompromete atu **FOKA** ba maneira envolvimentu foun, hodi apoia **nasaun ninia lideransa no hakarak rasik atu sai husi frajilidade** ne'ebé inkluzivu bazeia ba avaliasaun frajilidade ida ne'ebé nasaun maka diriji ne'ebé g7+ dezenvolve ona ho apoiu husi parseiru dezenvolvimentu sira, vizaun ida no planu ida ne'ebé nasaun maka diriji, kompaktu nasaun nian ida hodi implementa planu, uza PSG hodi monitoriza progresu, no apoia dialogu politiku ne'ebé inkluzivu no partisipativu. Ami rekoñese katak publiku no sociedade sivil ne'ebé envolve ona, ne'ebé konstrutivamente monitoriza prosesu foti desizaun, importante tebes hodi garante responsabilidade.

**F: Avaliasaun frajilidade.** Ami sei hala'o avaliasaun periodiku ida ne'ebé nasaun rasik maka diriji kona-ba kauza no karateristika frajilidade no fonte rezilensia hanesan baze ba vizaun ida, planu ida. Avaliasaun ne'e sei inklui grupu interesadu nasional prinsipal no ator la'os estadu nian no sei bazeia ba metodolojia ne'ebé armonizada, inklui **perspetiva frajilidade**,<sup>1</sup> ne'ebé g7+ dezenvolve tiha ona ho apoiu husi parseiru internasional sira.

**O: Vizaun ida, planu ida.** Ami sei dezenvolve no apoia vizaun no planu nasional ida hodi halao tranzisaun sai husi frajilidade. Nasaun maka sei difini no diriji rasik vizaun no planu ida ne'e, ne'ebé sei dezenvolve iha konsultasaun ho sociedade sivil no bazeia ba input husi avaliasaun frajilidade. Planu ne'e sei fleksivel hodi nune'e bele responde ba

prioridade iha prazu mediu no prazu naruk husi konsolidasaun dame no dezvoltimentu nasaun. Planu ne'ebé nasaun diriji ne'e sei sai hanesan enkuadramentu orientador ba prosesu identifikasaun prioridade nasional tomak. Planu hirak ne'e sei monitoriza, revee no ajusta kada tinan iha konsultasaun ho grupu interesadu prinsipal sira.

**C: Kompaktu.** komapaktu ida hanesan mekanizmu xave hodi implementa vizaun ida, planu ida. Kompaktu ida sei bazeia ba ideia/hanoin oi-oin husi grupu interesadu multipulu no publiku, no sei reve kada tinan liu husi reve ho grupu interesadu oi-oin. Rekoñese diferensa iha tipu frajilidade no kontestu nasional, no kompaktu ne'e karik sei mosu ho tipu ne'ebé la hanesan iha pontu oi-oin ba tranzisaun atu sai husi frajilidade, kompaktu ida sei garante armonizasaun no kordenasaun doador sira, hamenus duplikasaun, fragmentasaun no proliferasaun programa hirak.<sup>ii</sup> Kompaktu ida bele orienta selesaun ba modalidade ajuda, no bele fornese baze ba determinasaun alokasaun rekursu doador nian ne'ebé aliña ba prioridade nasional ne'ebé nasaun difini ona, tuir prinsipiu efikasiasaun ajuda. Kompaktu ne'e mos bele uza hanesan mekanizmu tranzisional xave iha tempu badak hodi orienta prioridade nasional ne'ebé nasaun difini ona nune'e mos estabese vizaun no planu ida, maibe sempre nasaun maka diriji. Hafoin hala'o tiha Forum Nivel Altu kona-ba Efikasiasaun Ajuda ba Dahaat iha Busan, Korea (29 Novembru - 1 Dezembru 2011), g7+ ho ninia parseiru internasional sira sei dezvoltolve definisaun 'kompaktu' komun ida ba nasaun frájil hodi bele kumpriende no sosializa diak liu tan, sei hasai orientasaun politika ba ninia uzu, no sei konsidera mekanizmu revizaun ho par ida entre nasaun membru hirak ho parseiru internasional hodi apoia ninia implementasaun.

**U: Utiliza PSG hodi monitoriza.** Ami sei uza alvu no indikator PSG hodi monitoriza progresu iha nivel nasaun.

**S: Apoia dialogu no lideransa politiku.** Ami sei hasa'e ami nia apoia ba prosesu dialogu politiku ne'ebé kredivel no inkluzivu. Ami sei apoia iniciativa global, rejional no nasional hodi dezvoltolve kapasidade lider governu no sosiedade sivil nian no instituisaun hirak atu diriji esforsu konsolidasaun dame no dezvoltimentu nasaun. Ami sei garante katak sei iha apoia espesifiku hodi promove partisipasaun foin-sa'e no feto sira nian iha dialogu politiku no iniciativa lideransa.

### III. FIAR – Kompromisu ba rezultadu

Hanesan parte husi “Akordu Foun” ami kompromete atu kria **FIAR** ba malu, liu husi **fornesimentu ajuda no jestaun rekursu ho efetivu liu tan no aliña rekursu hirak ne'e ba rezultadu**. Evidensiasaun dadaun ne'e hatudu katak implementasaun kompromisu hirak uluk nian la hanesan no ami re-afirma fali kompromisu ne'ebé halo ona iha Deklarasaun Paris, Ajenda ba Asaun Acra nian no iha Prinsipiu kona-ba Nasaun Frajil (2007).<sup>iii</sup> Bainhira hala'o ida ne'e, ami sei hametin transparensia, jestaun risku hodi uza sistema nasaun nian, haforsa kapasidade nasional no fo tulun tuir tempu, hadi'a velocidade no preditabilidade fundu hodi bele atinii rezultadu diak liu.

Pre-kondisaun esensial ida hodi bele hetan progresu iha kompromisu hotu relasiona ho Akordo Foun mak atu haburas konfiansa entre ema, comunidade, estadu no parseiru internasional. Ida ne'e sei envolve forneseimentu rezultadu ne'ebé vizível, rezultadu lalais no iha kontinuasaun.

**T: Transparensia.** Ami sei garante utilizasaun ajuda (APD no la'os APD) ne'ebé transparenti liu tan. Liu husi CAD, ami sei monitoriza rekursu tomak ne'ebé sirkula mai nasaun frájil no sei hare tuir ou akompaña assistensia internasional relasiona ho kada meta. Lokalmente, nasaun hirak ho apoia internasional, sei haforsa, ka bainhira prezisa, apoia kriasau no dezvoltimentu sistema relatóriu no planeamentu nasional (hanesan orsamentu, portal transparensia, sistema jestaun informasaun ajuda) no fo apoia ba mekanizmu supervizaun domestika inklui parlamentu nasional. Ami sei apoia transparensia liu tan iha sistema fiskal iha maneira ne'ebé konsistenti ho kapasidade no kontestu, bazeia ba pratika diak husi g7+ no sasukat internasional ne'ebé konkorda hamutuk ona kona-ba transparensia iha rekursu ajuda ho maneira ne'ebé konsistenti ho Iniciativa Transparensia Ajuda Internasional (ITAI).<sup>iv</sup> Ami sei solisita perspetiva sidadaun nian hodi avalia transparensia rekursu domestika no ajuda. Kompromisu hirak ne'e bazeia ba Deklarasaun Paris no Ajenda Asaun Akra nian.<sup>v</sup>

**R: Partilla risku.** Ami aseita risku husi envolvimentu durante tranzisaun, rekoñese katak risku bainhira la envolve iha kontestu ida ne'e bele ultrapasa fali risku barak relasiona ho envolvimentu. Ami sei identifika, hamutuk ho doador sira, estratejia mitigasaun risku hirak ne'ebé espesifiku ba nasaun, ne'ebé sei prezisa aprosimasaun oi-oin ba jestaun risku no dezvoltimentu kapasidade. Ami sei hala'o avaliaun konjunta ba risku espesifiku ne'ebé relasiona ho serbisu iha situasaun frájil no sei identifika no utiliza mekanizmu konjunta hodi hamenus no jere risku ho diak liu tan nune'e bele dezvoltolve kapasidade, no hametin uzu sistema nasaun nian, hakat ba investimentu ba prioridade konsolidasaun dame no dezvoltimentu nasaun, no hamenus vulnerabilidade ajuda.

**U: Uza no haforsa sistema nasional/nasaun nian.** Ami sei identifika hamutuk sasukat supervizaun no responsabilidade ne'ebé prezisa hodi hametin konfiansa iha no permite utilizasaun boot no haforsa sistema nasional.<sup>vi</sup> Governu beneficiariu, ho apoia husi parseiru internasional hirak, sei foti medida hotu ne'ebé razoavel hodi haforsa sira

nia sistema jestaun finanseira públiku husi baze to'o leten no sei hala'o prosesu ida ne'e ho transparenti. Ho nune'e, ami sei desenvolve kapasidade finanseira no administrativa hirak ne'ebé relasionadu iha instituisaun estadu nian laran, iha nivel nasional no lokal. Parseiru internasional sira sei hasa'e sira nia persentazen ajuda ne'ebé fornese liu husi sistema nasional<sup>vii</sup> bazeia ba sasukat no alvu hirak ne'ebé konkorda hamutuk ona iha nivel nasaun.<sup>viii</sup> Governu benefisiariu sei buka atu aumenta ninia persentajen gastu públiku ne'ebé finansia husi reseita nasional.

**S: Haforsa kapasidade.** Atu garante apoiu ne'ebé eficiente ba desenvolvimentu kapasidade kritiku instituisaun estadu no sociedade sivil nian iha maneira ne'ebé balansu diak, ami sei aumenta persentajen fundu ba desenvolvimentu kapasidade liu husi facilidade ida ne'ebé administra no finansia hamutuk.<sup>ix</sup> Ami sei hamenus substansialmente unidade implementasaun programa kada unidade no sei foka ba alvu ba utilizaun assistensia tékniku esternu, garante katak sira sei relata liu husi autoridade nasional relevante.<sup>x</sup> Ami sei serbisu ho kompriansaun ba kodigu konduta remunerasaun entre governu no parseiru internasional ba peritu nasional. Ami sei fasilita troka experiensia entre Sul-Sul no entre nasaun frajil ba nasaun frajil seluk iha tranzisaun atu sai husi frajilidade.

**T: Ajuda ne'ebé tuir tempu no predictavel.** Ami sei desenvolve no uza jestaun finanseira no prosedimentu aprovizionamentu ne'ebé simplifikadu, responsavel no lalais hodi hadi'a velocidade no fleksibilidade iha forneshimentu ajuda iha situasaun frajil,<sup>xi</sup> no revé enkuadramentu legal nasional hodi apoia ami nia objetivu komun. Ami compromete atu aumenta predictabilidade ajuda, inklui liu husi publikasaun kalkulasiun tinan tolu-to'o-lima oin mai (hanesan compromete ona iha Ajenda ba Asaun Acra), no atu utiliza didiak fundu nivel global no nivel nasaun nian ba konsolidasaun dame no desenvolvimentu nasaun.<sup>xii</sup> Bainhira lejislasaun nasional prevene ida ne'e, parseiru desenvolvimentu sira sei koko atu responde dezafiu hirak iha forneshimentu ajuda ne'e hodi permiti sira atu implementa kompromisu hirak ne'e ho diak liu tan. Ami sei fo dadus hirak ne'ebé presiza ba Komisaun Assistensia Desenvolvimentu (DAC)<sup>xiii</sup> nune'e sira bele relata regularmente kona-ba vulnerabilidade ajuda.

## AKORDU FOUN: husi Paris ba Busan

“**Akordu Foun**”, ne'ebé apresenta iha dokumentu ida ne'e, bazeia ba Deklarasaun Paris ba Efikasaun Ajuda (2005), Prinsipiu ba Intervensaun Internasional ne'ebé Diak iha Estadu no Situasaun Frajil (2007), Deklarasaun Kinshasa (2008), Ajenda ba Asaun Acra nian (2008), Deklarasaun D'fli no Deklarasaun Susesiva g7+ (2010-11), Roteiro Monróvia (2011) no serbisu ne'ebé grupu serbisu “Dialogu” hala'o ona.<sup>xiv</sup> Dokumentu ne'e mos rekoñese katak Prinsipiu no Pratika Diak husi Ajuda Umanitaria sei halo tuir ho respeitu ba asaun umanitaria.

Konferensia Cairo kona-ba Desenvolvimentu Kapasidade (Fevereiro 2011), Sorumutuk Adis Ababa kona-ba Konsolidasaun Dame no Desenvolvimentu Nasaun (Setembre 2011) no Retiru Ministerial g7+ iha Juba (Outubru 2011) kontribui ona ba desenvolvimentu konsensu iha Akordu Foun ne'e.

Rekoñese katak desenvolvimentu estadu ida ho dame presiza esforsu tempu naruk no aprosimasaun inkremental, ami sei implementa “**Akordu Foun**” entre tinan 2012-15, hanesan periodu esperimental.

## O “DIALOGU” KONTINUA

Ba oin, ami konkorda katak “Dialogu” iha funsaun fundamental hodi apoia ninia membru sira iha implementasaun “**Akordu Foun**” no continua promove maneira ne'ebé efektivu hodi apoia nasaun sira atu tranzisiona sai husi frajilidade no harii nasaun ne'ebé nakonu ho dame. Grupú g7+ sei continua sai nafatin hanesan mekanizmu global ba nasaun no nasaun diriji atu monitoriza, relata no fó atensaun ba dezafiu úniku ne'ebé nasaun frájlil sira hasoru. Parseiru internasional sira sei continua apoia mekanizmu ida ne'e. “Dialogu” sei continua fo plataforma ba ninia membru sira no kobre mos parseiru seluk ne'ebé interesadu, atu diskuti progresu tomak iha esforsu reforma hodi apoia konsolidasaun dame no desenvolvimentu nasaun no konkorda asaun konjunta adisional ruma ne'ebé karik presiza. Ami sei hasoru malu kada tinan hodi hala'o ida ne'e.

Ami konkorda atu serbisu hamutuk liu husi “Dialogu” hodi implementa Akordu Foun ida ne'e, inklui *liu husi*:

- **Halo pilotu:** Ami sei apoia pilotu ba “**Akordu Foun**” (PSG, FOCUS no FIAR) iha nasaun hirak ne'ebé nomeia aan rasik, inklui Afganistaun, Republika Afrika Sentral, Republika Demokratika Congo, Libéria, Serra Leoa, Republika Sul Sudaun no Timor-Leste no parseiru doador hirak ne'ebé nomeia aan rasik iha nasaun hirak ne'e. Atu hala'o ida ne'e, ami sei konsidera fonte finansiamentu ne'ebé apropriadu.
- **Aprezentsaun relatóriu:** Ami sei apresenta relatóriu kona-ba implementasaun kompromisu hirak “**Ákordu Foun**” nian konsentra iha nivel nasaun no iha nivel global. Ami sei konkorda hamutuk mekanizmu atu hodi hala'o ida ne'e.

<sup>i</sup> Espetru frajilidade hanesan instrumentu diagnostiku ida hodi tulun estadu hirak ne'ebé frajil no hetan impaktu husi konfliktu hodi identifika natureza husi sira nia frajilidade rasik no planeia dalan ida atu tranzisiona aan ba estabilidade no desenvolvimentu.

- 
- ii Haree Prinsipiu ba Nasaun Frajil 7: “Aliña ho prioridade lokal iha maneira oi-oin iha kontestu oi-oin. Bainhira Governu hatudu vontade politiku atu promove dezentvolvimentu, maibe menus kapasidade, ator internasional sira tenki apoia estratejia governu nian. Bainhira kapasidade limitadu, utilizaun instrumentu ajuda alternativu – hanesan kompaktu internasional ka fundu fidusiaru ho doador múltiplu (*Multi-donor trust fund*) – bele fasilita prioridade komun no responsabilidade ba ezekusaun entre instituisaun nasional no internasional”.
- iii Haree *2011 Survey on Monitoring the Paris Declaration* (OCDE 2011) e [\*International Engagement in Fragile States: Can't we do better?\*](#) (OCDE 2011).
- iv Transparensia mos bele mellora liu husi padraun internasional seluk.
- v Haree Ajenda ba Asaun Acra nian, paragrafu 24a.
- vi Ida ne'e sei inklui kontratasau serbisu finanseira ba esternu, uza ajenti monitorizasaun independenti, jestaun konjunta ba ezekusaun programa, avaliasaun ne'ebé doador maka diriji kona-ba politika ajuda no akizisaun hirak seluk ne'ebé relevante hodi garante atinjimentu objetivu hirak ne'e.
- vii Bazeia ba Ajenda ba Asaun Acra nian, paragrafu 5.
- viii Tuir permisaun husi doador sira nia provizaun legal hirak ne'ebé aplikavel.
- ix Konsistente ho provizaun legal doador nian ne'ebé aplikavel no bazeia ba alvu 4 husi Deklarasaun Paris katak “%50 husi sirkulasaun koperasaun tekniku sei implementa liu husi programa kordenadu ne'ebé konsistenti ho estratejia dezentvolvimentu nasional”.
- x Bazeia ba alvu 6 husi Deklarasaun Paris ne'ebé hakarak atu “hamenus dois tersu husi unidade implementasaun projetu ne'ebé paralelu (PIU)” iha nasaun laran, no Prinsipiu ba Nasaun Frajil 2: Labele Halo Ofensa”.
- xi Bainhira posivel, no tuir lejislasaun nasional.
- xii Bainhira posivel, tuir lejislasaun nasional no Ajenda ba Asaun Acra nian, paragrafu 26c.
- xiii DAC hanesan komisaun ba Organizasaun Koperasaun Ekonomia no Dezentvolvimentu (OECD). OECD mos hanesan Sekretariadu ba Dialogu Internasional kona-ba Konsolidasaun Dame no Dezentvolvimentu Nasaun.
- xiv Grupu Serbisu “Dialogu” haat hasoru malu no diskuti obstakulu prinsipal ba apoiu efetivu ba konsolidasaun dame no dezentvolvimentu nasaun, no rekomendasaun atu responde obstakulu hirak ne'e iha area hirak tuir mai ne'e: i) diálogo politiku ii) prosesu planu; iii) dezentvolvimentu kapasidade; iv) instrumentu ajuda.